

समा. 09.20 Hrs

- केन्द्री गृहमंत्री अमित शाह होर अज्ज हरियाणा च उत्तरी-जोन परिषद दी बैठक दी अध्यक्षता करगंन-उपराज्यपाल मनोज सिन्हा बी होगंन शामिल।
- उपराज्यपाल मनोज सिन्हा होरें मुख्य भरै च हमले करने दी आतंकी योजना दा भांडा फोड़ करने लेई जम्मू-कश्मीर पुलसै दी सराहना कीती। एन.आई.ए नै लाल किला कार धमाके मामले च पैहली बड्डी गिरफ्तारी कीती।
- केन्द्री मंत्री डाक्टर जितेन्द्र सिंह होरें आखेया ऐ जे स्कूली बच्चें दी समर्थ गी दिशा ते प्रोत्साहन देने लेई सरकार केंई तकनीकी प्रोत्साहन देआ रदी ऐ।
- हिमालयाई क्राओस्फीयर बारे त्री अंतराष्ट्रीय कांफ्रेस जम्मू युनिवर्सिटी दे भद्रवाह कैम्पस च शुरू।
- रणजी ट्रॉफी च जम्मू-कश्मीर नै हैदराबाद खलाफ शानदार वापसी करदे होई ओहदे 6 खडारी छड़े 88 रन्ज पर आऊट करी दिते।

< > < > < > < > < > < >

केन्द्रीय गृहमंत्री अमित शाह होर अज्ज हरियाणा दे फरीदाबाद च लोआई जा रदी क्षेत्रीय परिषद दी बैठक दी प्रधानता करगंन।

इस बैठक च पंजाब- हरियाणा ते हिमाचल प्रदेश दे मुखमंत्रियों दे इलावा जम्मू-कश्मीर- लद्दाख ते दिल्ली दे उपराज्यपालें दे कन्नो-कन्नो चंडीगढ़ दे प्रशासक दे बी हिस्सा लैने दी मेद ऐ।

परिषद दी इस 32मीं बैठक च राज्य सरकारें बश्कार तालमेल बनाने- पानी दी बंड सरबन्धी मुद्दें सनें विकास परियोजनाएं पर चर्चा होने दी मेद ऐ।

<><><><><><>

LG- Policemen

उपराज्यपाल मनोज सिन्हा होरें आखेया जे जम्मू-कश्मीर पुलसै दी ब्हादुरी- सम्पूर्ण भाव ते अपनी ड्यूटी गी अंजाम दिंदे मौके पूरी चाल्ली पेशेवराना राँ इख्तेयार करियै कम्म करना इक सराहने आली गल्ल ऐ। उनें आखेया जे पुलसै दियें इनें खासियतें दी वजह कन्नै मुख्य भरै च योजना बद्ध तरीके- आतंकी हमले करने दी आतंकवादियें दी इक बड्डी ते खतरनाक साजश गी नाकाम कीता जाई सकेया ऐ। एह गल्ल एल.जी. होरें कल श्री गुरु तेग बहादुर जी हुंदा साङ्गे त्रै-सौमे शहीदी दिवस दे मौके पर आयोजित इक नगर-कीर्तन च शिरकत करदे मौके आखी। इस मौके पर एल.जी होरें अगगे आखेया.....

<><><><><><>

NIA- Arrest

राष्ट्री जांच एजेंसी (एन.आई.ए) नै लाल किला कार धमाके दे मामले च दिल्ली थमां आमिर रशीद अली नां दे इक कश्मीरी बसनीक गी गिरफ्तार कीता ऐ। एजेंसी मुजब आमिर रशीद नै कथित तौर पर आत्मघाती हमलावर उमर नबी कन्नै रलियै इस आतंकी हमले गी अंजाब देने दी साजिश रची ही- जेदे च 10 बेदोसे लोकें दी जान चली गई ही- कोई 25 होर जख्मी होई गे हे। एन.आई.ए नै आखेया ऐ जे धमाके च इस्तेमाल कीती गेदी कार आमिर दे नां पर पंजीकृत ही ते नबी दी इक होर गड्डी गी फोरेंसिक जांच लेई जब्त करी लैता गया ऐ। एजेंसी नै अजें तगर 73 गवाहें दी जांच कीती ऐ- जिंदे च धमाके च घायल होए दे लोक बी शामिल न ते इस बड्डी साजिश दा पर्दाफाश करने ते होर मते संदिग्धें दा पता लाने आस्तै केई राज्यें च पुलस बलें कन्नै नेडमा तालमेल बनाइयै कम्म करा रदी ऐ।

<><><><><><>

Jitender -K.V. Ramban

प्रधानमंत्री हुंदे दफ्तरै च राज्यमंत्री डाक्टर जितेन्द्र सिंह होरें विद्यार्थियों ते अध्यापकें गी जोर देइयै आखेया ओ जे ओ शिक्षा ते तकनीकी प्रोत्साहन ते मोदी सरकार आसेया शुरु कीती गेदियें विशेष स्कीमें दा पूरा-पूरा फैयदा ठोआन तां जे शुरु च गै बच्चें अंदर नमियें काहडें बक्खी दिलचस्पी वधै ते ओ आंपू अपनी सोच-समझ ते समर्था मुजब कम्म करने लेई स्टार्ट-अप शुरु करने दे काबल बनी सकन। कल कठुआ जिले दे रामकोट इलाके च हाल च मजूर होए दे केन्द्री विद्यालय दे पैहले शैक्षणिक सत्र दा उदघाटन करने मौके डाक्टर जितेन्द्र सिंह होरें आखेया जे इनें कोशशें दा मकसद बच्चें दियें छमताएं दा शुरु च गै पता लाइयै उनेंगी भविक्ख लेई तयार करना ऐ। उनें 10 कोला लेइयै 17एं बरे तोड़ी दी उम्री आहले बच्चें दे माता-पितें गी आखेया जे ओ INSPIRE-MANAK जनेई स्कीमें तैहत थोने आहली ग्रांट ते वजीफे दा फैयदा ठोआने लेई अगगे औन। उनें अगगे आखेया

<><><><><><>

Intl Conference Bhaderwah

हिमालयाई क्षेत्रें च क्रायओ-स्फीयर च बदलाव बारे त्री दंऊ रोजा कांफ्रेंस कल जम्मू युनिवर्सिटी दे भद्रवाह कैम्पस च शुरु होई- जेहदे च भारत दे इलावा रुस ते जापान थमां आए दे साईसदान- माहिर ते निति निधारक हिस्सा लै करदे न। इस सम्मेलन दा मुंडला मकसद हिमालयाई क्षेत्रें च आवा करदे मौसमी ते पर्यावरण सरबंधि बदलाव-पर्यावरण ते लोकें दे जीवन पर पौने आहले असर बारे जानना ते एहदा विशलेषण करना ऐ। इस मौके अपने सम्बोधनै च विचार रखदे होई मानजोग परौहने ते पदमश्री कन्नै सम्मानित छेवाग फुन्सोग होरें आखेया

<><><><><><>

Self Employment Udhampur

जम्मू-कश्मीर च स्वरोजगार गी बढावा देने लेई केन्द्र ते यू.टी सरकार दियां केई स्कीमां जमीनी सतह पर असरदार साबत होई करदियां ना। प्रधानमंत्री रोजगार सृजन कार्यक्रम ते ग्रामीण रोजगार सृजन कार्यक्रम जिसी खादी ते ग्रामोद्योग बोर्ड आसेया लागू कीता जा रदा ऐ- दी मेद कन्नै नौजवान नौकरियें पिच्छे खज्जल होने दे बजाए हून अपना कम्म शुरू करियै कम्म-रोजगार देने आहले बनै करदे ना। इनें स्कीमें तैहत माली सहायता- कम्म शुरू करने च मार्ग-दर्शन ते सिखलाई बी दिती जंदी ऐ जेहदे नै उनेंगी अपना कम्म शुरू करने च काफी मदद थोंदी ऐ। उधमपुर जिले दे जाखर इलाके दे अलताफ हुसैन नै ग्रामीण रोजगार सृजन कार्यक्रम तैहत इक डेयरी खोल्ली ऐ ते अज्ज ओ अपने पैरे पर खड़ोइयै मते खुश ना। स्टाडे जिला संवाददाता कन्नै गल्ल करदे होई अलताफ हुसैन नै आखेया

<><><><><><>

Ramban Handicraft

रामबन च दस्तकारी ते हथखड्डी विभाग कारखानादार योजना जनेही पैहलकदमियें राएं रिवायती दस्तकारियें च परतियै नमें सिरेया जान भरने ते स्वरोजगार गी बढावा देने लेई कम्म करा रदा ऐ। जिले च सत्त सिखलाई केन्द्र न जिंदे च बक्ख-बक्ख दस्तकारियें बारे सिखलाई दिती जंदी ऐ- जिंदे च बेरोजगार नौजवानें- खासकरियै महिलायें पर खास तौर पर ध्यान दिता जंदा ऐ। सखेतरुएं गी हर महीने वजीफा बी दिता जंदा ऐ- जेहदे च उन्नत पाठ्यक्रमें आस्तै 700 रपे ते बुनियादी सिखलाई लेई 500 रपे दिते जंदे ना। अधिकारियें दा आखना ऐ जे इनें जतनें दा मकसद नौजवानें ते महिलायें गी सशक्त बनाने दे कन्नो-कन्नी मुकामी कला दे रुपै गी संरक्षित करना ऐ- उनेंगी स्थाई आजीविका दे निर्माण आस्तै हुनर ते माली मदाद उपलब्ध करोआना ऐ। आकाशवाणी समाचार कन्नै गल्ल करदे होई दस्तकारी दे हथखड्डी विभाग रामबन दे सहायक निदेशक प्रदीप शान होरें आखेया.....

<><><><><><>

Ramban Handicrafts

जंदे रोज जम्मू दे साईस कालेज ग्राउंड च जम्मू-कश्मीर ते हैदराबाद बश्कार रणजी ट्राफी दे 5में दौर दे मैच दे पैहले ध्याड़े 16 विकेटां डिगियां। 170 रन्जें पर ऑल-आउट होने दे परैन्त जम्मू-कश्मीर नै अपने स्टार गेंदबाद आकिन नबी दी शानदार गेंदबाजी दी मदद कन्नै मैच च वापसी कीती। नबी नै त्रै विकेटां लेइयै हैदराबाद दी बल्लेबाजी दा लक्क त्रोड़ी दिता। मेहमान टीम कल दे ध्याड़े दा खेडु खत्म होने तगरग 6 विकेटें पर 88 रन्ज बनाइयै संघर्ष करा रदी ही।

<><><><><><>